

Newspaper	UTUSAN MALAYSIA
Date	04 DECEMBER 2016

Hishammuddin minta Tun M ingat kembali pesanan 1976

um-4/12/2016

KUALA LUMPUR 3 Dis. - Bekas Perdana Menteri, Tun Dr. Mahathir Mohamad telah berubah menjadi pemimpin yang cakap tidak serupa bikin hanya kerana kebenciannya terhadap Presiden UMNO, Datuk Seri Najib Tun Razak.

Ini kerana pada 1976, dalam pentas Perhimpunan Agung UMNO, Dr. Mahathir yang ketika itu memegang jawatan nombor dua parti pernah mengingatkan seluruh ahli agar jangan melemahkan kepemimpinan secara sengaja.

Naib Presiden UMNO, Datuk Seri Hishammuddin Tun Hussein berkata, jika pada 1976 Dr. Mahathir menggesa seluruh ahli parti mempertahankan pemimpin, kini bekas Perdana Menteri itu menghina ahli UMNO yang berbuat demikian.

"Pesanan (1976) yang tepat, tetapi Tun kenapa bila hari ini kita menzahirkan kesetiaan kepada pemimpin, kita dipersalahkan. Kenapa bila kita mempertahankan kepemimpinan, kita dihina. Kenapa



HISHAMMUDDIN TUN HUSSEIN ketika menyampaikan ucapan penggulungan Perhimpunan Agung UMNO 2016, semalam.

bila kita pertahankan Presiden, kita dicemuh?

"Cakap tak serupa bikin, bikin tak serupa cakap," katanya sambil memetik kembali kata-kata Dr. Mahathir pada 1976 ketika menggulung perbahasan Perhimpunan Agung UMNO 2016, di sini hari ini.

Petikan tersebut adalah seperti berikut: "UMNO tidak

wujud untuk pemimpinnya. Semua pemimpin adalah sementara. Mereka akan pergi dan akan diganti oleh pemimpin yang baharu, tetapi pemimpin dan kepimpinan adalah penting bagi pertubuhan.

"Pemimpin tidak perlu dipertahankan semata-mata kerana dia pemimpin, dia juga tidak harus dilemahkan

dengan sengaja. Tidak ada kebaikan dari kepimpinan yang lemah sepertimana tidak ada manfaat dari pertubuhan yang lemah."

Dalam pada itu, Hishammuddin berkata, selain ketiaan dan kesetiaan kepada pucuk kepemimpinan, seluruh ahli UMNO juga mempunyai tanggungjawab yang cukup kritikal iaitu memenangi hati rakyat dengan memenuhi setiap permintaan mereka.

Katanya, tanggungjawab itu perlu dipikul tanpa culas bagi memastikan kemenangan dalam pilihan raya umum akan datang berpihak kepada Barisan Nasional (BN) kerana tanpa kuasa politik segala perancangan untuk memajukan bangsa akan terhenti.

"Kita berilah sepenuh komitmen, taat dan setia. Kita laksanakan arahan kepemimpinan kita pastikan gelombang yang kita wujudkan hari ini akan menjadi tsunami menuju Pilihan Raya Umum Ke-14," katanya.